



**Sud Bosne i Hercegovine**  
**Суд Босне и Херцеговине**

---

**Broj: S1 3 IŽ 044054 22 IŽ**  
**Sarajevo, 07.10.2022. godine**

Sud Bosne i Hercegovine u Sarajevu, u Apelacionom vijeću sastavljenom od sudija Vesne Trifunović Srete Crnjak, predsjednika vijeća, Dinke Bešlagić-Čovrk i Srete Crnjak, kao članova vijeća, odlučujući o žalbi političkog subjekta Pokret demokratske akcije, Fra Grge Martića 8, 75000 Tuzla, protiv Odluke Centralne izborne komisije Bosne i Hercegovine, broj: 05-1-07-5-12/22 od 29.09.2022.godine, na nejavnoj sjednici održanoj dana 07.10.2022. godine, donio je

**R J E Š E N J E**

Žalba se odbija.

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, žalba političkog subjekta Pokret demokratske akcije izjavljena na Odluku Općinske izborne komisije Banovići od 15.09.2022. godine, je odbijena, a Odluka Centralne izborne komisije BiH broj 05-1-07-5-12/22 od 27.09.2022. godine je stavljena van snage.

Protiv navedene odluke žalbu je izjavio politički subjekt Pokret demokratske akcije zbog povrede odredbi materijalnog prava, pogrešno i nepotpuno utvrđenog činjeničnog stanja i povrede pravila postupka.

U žalbi navodi da je Pokret demokratske akcije 03.09.2022. godine Općinskoj izbornoj komisiji Banovići podnio prigovor iz razloga što je SDA 02.09.2022. godine postavila plakat na parceli 905/2 K.O. Seona-javna površina koja je upisana u MZ Aljkovići. Rješavajući po navedenom prigovoru Općinska izborna komisija je donijela odluku 06.09.2022. godine kojom je usvojila navedeni prigovor te političkom subjektu SDA izrekla novčanu kaznu od 3.000,00 KM, jer u vrijeme na koji se prigovor odnosi nije imao odbrenje za zauzimanje javne površine.

Međutim, nakon izjavljene žalbe političkog subjekta SDA, novom odlukom Općinska izborna komisija Banovići od 15.09.2022. godine je preinačila svoju Odluku od 06.09.2022. godine na način da je žalbu političkog subjekta SDA usvojila i ukinula novčanu kaznu političkom subjektu SDA BiH-OO SDA Banovići, a prigovor političkog subjekta PDA BiH odbacila kao neosnovan. Razlog izmjene Odluke je novo rješenje Službe za stambeno komunalne poslove, zaštitu i okoliš i inspekciju od

05.09.2022. godine kojim je izmjenjeno dotadašnje rješenje na način da je odobreno privremeno korištenje javnih površina u gradskom području i u svim mjesnim zajednicama Općine Banovići na svim slobodnim raspoloživim javnim površinama političkom subjektu SDA BiH.

Žalbom se navodi da Općinska izborna komisija nije imala zakonski utemeljen razlog za izmjenu prvobitno donesene odluke jer je povreda učinjena dana 02.09.2022. godine, a izmjena donesena 05.09.2022. godine, pa nije mogla imati retroaktivno dejstvo od 02.09.2022. godine kada je učinjena povreda odredbe 7.2 Izbornog zakona BiH.

Predlaže da se žalba usvoji te političkom subjektu Stranka demokratske akcije izrekne sankcija za povredu odredbe člana 7.2 Izbornog zakona BiH.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana iz sljedećih razloga:

Iz stanja spisa proizilazi da je Centralna izborna komisija Bosne i Hercegovine (u daljem tekstu CIK BiH) donijela pobijanu odluku iz razloga što je, nakon uvida u rješenje Službe za stambeno komunalne poslove, zaštitu okoliša i inspekcije broj:07-10-2371-1/22-Ž od 05.09.2022. godine a kojim se mijenja ranije doneseno rješenje, te se daje odobrenje političkom subjektu Stranka demokratske akcije za privremeno korištenje javnih površina u gradskom području i u svim mjesnim zajednicama općine Banovići na svim slobodnim i raspoloživim javnim površinama za period od 02.09.2022. godine do 02.10.2022. godine odnosno da je odobrenje izdato i za period kada je prema podnosiocu žalbe učinjena povreda odredbe člana 7.2 Izbornog zakona BiH.

Ispitujući pravilnost, zakonitost pobijane odluke ovaj sud je cijenio žalbene navode žalitelja koji su odlučni u ovoj pravnoj stvari.

Članom 7.3.stav (3) Izbornog zakona BiH je propisano da nadležni organi neće dozvoliti političkim strankama, koalicijama, listama nezavisnih kandidata i nezavisnim kandidatima da postavljaju oglase, plakate, postere, odnosno da pišu svoja imena ili slogane koji su u vezi sa izbornom kampanjom, unutar ili na zgradama u kojima su smješteni organi vlasti na svim nivoima, javna preduzeća, javne ustanove i mjesne zajednice, na vjerskim objektima, na javnim putevima i javnim površinama, osim na mjestima predviđenim za plakatiranje i oglašavanje.

Dakle, izmjenom rješenja Službe za stambeno komunalne poslove, zaštitu okoliša i inspekcije Stranka demokratske akcije je i za period od 02.09.2022. godine do 02.10.2022 godine dobila odobrenje da u tom periodu koristi na svim slobodnim i raspoloživim javnim površinama i u svim mjesnim zajednicama općine Banovići.

Naime, kod činjenice da je Stranka demokratske akcije podnijela zahtjev još 16.08.2022. godine Općini Banovići – Službi za stambeno komunalne poslove, zaštitu okoliša i inspekcije za odobrenje korištenja javne površine na svim javnim površinama na području Opštine Banovići i u situaciji kada Služba Odlukom od

01.09.2022. godine nije odlučivala i za dio postavljenog zahtjeva koji se odnosi na javne površine u mjesnim zajednicama Banovići, nego tek izmjenjenom Odlukom od 05.09.2022. godine, to se ne može prihvatiti žalbeni navod da se radi o retroaktivnoj primjeni, nego upravo o konačnoj odluci koja obuhvata rješenje kompletnog zahtjeva stranke i veže sa za period od 02.09. do 2.10.2022. godine, a iz čega proizilazi da nije učinjena povreda člana 7.2 Izbornog zakona BiH.

Iz navedenih razloga i po shvatanju drugostepenog vijeća Centralna izborna komisija BiH je pravilno utvrdila da se predmetna odluka Općinske izborne komisije Banovići od 15.09.2022. godine kojom je ukinuta novčana kazna političkom subjektu SDA u iznosu od 3.000,00 KM zasniva na pravilno i potpuno utvrđenom činjeničnom stanju i pravilnoj primjeni materijalnog prava.

S obzirom na navedeno, po ocjeni ovog vijeća, pobija Odluka Centralne izborne komisije BiH je pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj 19/02 do 74/10), valjalo odbiti.

**PREDSJEDNIK VIJEĆA  
S U D I J A**

**Vesna Trifunović**